

尊宗贅義

歷城江鍾秀著

風陵文庫

文庫19

F/02



尊宗者議

尊宗贅議

光緒壬寅仲冬
山東書局刊印

F0102

尊宗贅議序

尊宗贅議歷城江生鍾秀所著以尊

王宗

聖為當今自強第一要義蓋尊

王人乃皆知有

君宗

聖人乃皆知有

師人人知有

君師而後吾

尊宗贅議

序

君師之大經大訓人始不敢菲薄滅裂之而政以行道以明犯上作亂之事乃無因而起士食舊德農服先疇工商各安其業焉竊讀顧氏日知錄有言民吾同胞今日之民吾與達而在上者之所共也救民以事已達而在上者之責也救民以言未達而在下者之責也生服膺此語久矣余重其爲人嘗與縱談中外輒慨然曰世運至今孔子之道有其名無其實楊子之道有其實無其名此中國積弱之病源也聞嘗觀吾華民莫不自名爲孔子之教矣及熟察其處心積慮

則又無非爲我僅沾沾利益一身而止外此者雖以君師之大且尊吾華民亦不暇計及也以鍾秀所見各國民族吾華者於其君師雖死不渝而吾華民於吾君師何遠弗逮也識者謂其有道以使之然鍾秀因竊擬數議以爲吾華民忠敬吾

君師之道焉夫春秋一編不外尊王孟子七篇無非宗聖山左爲孔孟桑梓天下宗望當此世教衰微本籍之大使無人出一言以維斯道於不敝固非一邑之辱實山左之恥也況今日拘墟之儒以帖括詞章爲聖

道見有講實學者卽屏爲離經畔聖痛斥不遺餘力而囂張之士又多謂六經以外大有奇書五教之防亦覺太苦恐數百年後將又有焚坑之禍爾令後之識者推原其始謂由今日拘墟者激之而囂張者成之也慨已鍾秀是以不避出位之罪狂迂之誚自忘下愚妄思羽翼而挽救之焉憂世憂民之君子幸恕鍾秀宥鍾秀鑒鍾秀區區苦衷也然非鍾秀幼時父母朝夕教誨鍾秀亦安能叨侍當路大人之側偶有擬議便乘間請示荒謬也乎生之所言如此則其平

日得力於父母者深矣生父名宗先字孝堂孝友純正一鄉推重母曲氏賢而早卒旌君壽山女余於此益信仁者之必有後也嗟乎運會遷流波靡益甚世道人心不知伊于胡底如生所擬數議挽回風俗扶持綱常將撥亂世而反之正洵可謂大有功於名教也抑余又嘗聞之莫爲之前雖美弗彰向使生不遇張大中丞安圃尹大宗師佩之胡大方伯鼎臣取其整頓鄉約議暨條規頒行通省亦安能聲名卓著若是哉竊願憂世憂民之君子復取生所擬崇正諸議

酌其可行者行之使吾華民忠

君敬

師之心益油然而生以立吾華自強之本而免各國譏笑是又余所高望而不能自己者也光緒壬寅孟冬厯城孔生繼儒往謁見其案頭存稿感佩者久之乃持之歸將商於同人付諸梓遂往求呂刺史子幹爲之鑒定而以序屬余余嘉江生之志重孔生暨諸君之義因急爲之序

賜進士出身二品頂戴前署山東督糧道翰林院庶吉士

友生郭鑑襄序於山左之寄廬

尊宗贅議自序

國之強弱視乎教化自古國家權勢最強之時皆國
家教化最盛之時我

朝康雍乾嘉百餘年間號稱最強然考其時皆恃教化
為之樞機自通都大邑以至窮鄉僻壤莫不設立鄉
約每月朔望齊集耆老居民宣講

聖諭凡民皆得沾濡教澤曉暢義理惟日以尊

王宗

聖為要圖迄今追憶其盛猶景慕不置而令人喟然歎

聖諭一書之流澤為甚長也光緒己亥鍾秀僥幸入學蒙前督學華卿榮大宗師舉

聖諭諄諄誥諸生在鄉以時宣講鍾秀因嗜讀之迨庚子夏拳術盛行鄉人若狂鍾秀恭舉

聖諭多方勸戒本村人士以是得獨免於難他村多被拘置之法慘苦不忍言狀每自忖曰凡事雖曰天命豈非人力哉如鍾秀之不肖幸賴父母得讀孔孟書稍識邪正且能憑三寸舌宣講

聖諭拯一村之人況學問識力什百萬倍於鍾秀者乎因是

知防患在遏其萌而絕其源也聞嘗考之戰國楊墨假託仁義惑世誣民孟子推其禍不至人相食不止今日中國各匪假託鬼神惑世誣民識者推其禍亦不至人相食不止嗟乎此憂世憂民之君子所為太息流涕而同此悲憤者也使於此時不思急與憂世憂民之君子以共正人心息邪說距跛行放淫辭為奮勉而挽救之竊恐中國各匪假託鬼神其毒不祇若戰國楊墨假義託仁遂流為李斯趙高無窮之禍而人類且將盡絕於天壤也鍾秀竊不揣固陋迫於

真宗實錄
杞憂平居私擬崇正議校士館議切實整頓鄉約議
鄉約條規慎選約正議總辦全省鄉約議切實稽察
鄉約議救貧議安游民議安客民議養氣議諸篇冀
憂世憂民之君子見而棄其荒謬採其有當施之天
下以拯此數十百萬生靈焉不大愈於鍾秀之僅能
區區拯濟一村哉辛丑夏敬念世王母本生王母承
嗣兩王母世母皆以節孝兼全

旌表愧建坊無力議以碑代乃求書於陶刺史廉泉又值
長清孝廉周君復卿同邑直刺嚴君笠樵賈君可笙

暨諸縉紳爲先外大父曲壽山公請

旌併公送入祀忠義孝悌祠郭觀察介臣亦躬送焉鍾秀

以是得與介臣公祖廉泉父臺識二公皆以君子儒
出仕樂談經世學鍾秀因先將平日所擬切實整頓
鄉約議呈覽二公遂代上之時中丞安圃張大公祖
督學佩之尹大宗師方伯鼎臣胡大公祖胥以正人
心厚民生崇聖道衛

宗社爲汲汲故急刊印若干本通飭各府州縣一律舉行

鍾秀竊愧識謬謀疏無濟於世自忘已爲何如人冒

王宗

聖哉倘他日崇正諸議更蒙憂世憂民之君子採其可行者行之則於尊宗兩端愈有所裨而康雍乾嘉之盛將不難復見於今日也大夫之賢者士之仁者其幸不我遐棄而匡鍾秀所不逮哉

光緒二十八年九月歷城江鍾秀謹誌於種竹山房

尊宗贅議目錄

關中呂申子幹先生鑒定

崇正學議

校士館議

切實整頓鄉約議札附

鄉約條規札附

慎選約正議

總辦全省鄉約議

切實稽察鄉約議稟附

救貧議

安遊民議

安客民議

養氣議

醫心議

江氏五節孝碑

附後

曲旌君傳

附後

尊宗贊議

山左歷城江鍾秀壽臣著

擬懇 奏請軍民人等通行祀聖謁聖以崇正學議
中庸推至聖之無外也曰溥博如天淵泉如淵見而
民莫不敬言而民莫不信行而民莫不悅聲名洋溢
中國施及蠻貊舟車所至人力所通天之所覆地之
所載日月所照霜露所墜凡有血氣者莫不尊親故
曰配天誠以天無外至聖亦無外也夫子思所謂至
聖果孰指耶溯開闢以來聖人多矣惟孔子稱至聖

有若曰出於其類拔乎其萃自生民以來未有盛於孔子也子貢曰由百世之後等百世之王莫之能違也宰我曰以予觀於夫子賢於堯舜遠矣儀封人曰天將以夫子爲木鐸間嘗熟繹木鐸之喻而以經世證之夏禹八年入午之初孔子應運生於周靈王庚戌值姤之鼎分鼎之蠱而又值年之履故我孔子於皇之道帝之德王之功伯之力皆得取而贊之述之序之褒貶之易贊自羲農書述自堯舜詩序自文武春秋褒貶自桓文孔子固超皇帝王伯而作萬世之

師萃道德功力而垂萬世之統誠所謂履以辨上下定民志蠱以振民育德而爲三才鼎峙應姤象施命誥四方品物咸章之義也天有四時春夏秋冬聖人有四府易書詩春秋春以生物易以生民夏以長物書以長民秋以收物詩以收民冬以藏物春秋以藏民人不能廢天之春夏秋冬而使不行人卽不能廢聖人之易書詩春秋而使不行此固不待智者而始知也邵子曰人皆惜仲尼無土吾謂仲尼以萬世爲土大哉邵子一言萬古矣然邵子之說非無本也中

庸天下至聖章已豫言見而民莫不敬言而民莫不信行而民莫不悅聲名洋溢中國施及蠻貊舟車所至人力所通天之所覆地之所載日月所照霜露所墜凡有血氣者莫不尊親故曰配天固斷斷乎其不爽也然西人之於其教宗也方且君卿以至庶人咸七日一禮其教宗所在城邑村落皆繁立其教宗之廟飲食必祭寤寐如見其讀其教宗之遺文也錦繡以藉之蹈舞以誦之其宣其教宗之宗旨也重瀛巨海越數萬里不憚舌敝脣焦以傳之卽飢渴戮辱亦

所不辭而我中國反郡邑外無孔廟致使佛寺道觀所在林立無處無之多於孔廟其數不億且自郡邑有司朔望行香外上自縉紳下及士庶自非入學登科及第無有謁孔子者士子自易業後無有復誦聖經者又安望其蹈舞以誦錦繡以藉重瀛巨海不憚越數萬里以傳之哉且夫孔子之道參天地贊化育其大綱則明德新民止至善其細目則格致誠正修齊治平自王公以至庶人遵之則吉悖之則凶遵之則全其爲人悖之則入於禽獸我中國人民宜何如

欽之崇之奉之守之而無人不以尊孔子爲心也乃西人之於其教宗也竟如彼而我中國冠裳之族禮樂之邦反如此竊嘗上下千古反覆推求而知其故矣一害於楊墨再害於申韓三害於秦政四害於數術五害於六朝隋唐至今專尙詞章嗟乎害孔子之道者非一端而詞章爲尤貌爲聖道而實聖道之賊講格律工字句沒溺於淺聞小見以塗主司之耳目是爲侮道侈淫辭競詭辨飾奸心盜行逐世壟斷而猶自以爲遵道是爲敗道宜其處人家國變未至則虛諉苟偷妄自尊大變旣至則畏縮遁避張皇驚顧漫無措施也無識之民見其如是遂詬病聖道爲足以弱國而狡焉思逞之徒乃得乘間各出其荒唐奇謬旁門邪說以瞽惑愚民而天下亦靡然從之此孔子在天之靈所疾首痛心而無可如何者也其間雖經東西兩漢表章經術宋明兩代大儒迭起發明義理繼以我

朝

列祖

列宗憲聖右文崇實黜華維持之而不足維持不足則名存而實亡其士大夫則奔競鑽營飲食徵逐而鮮見以精一危微之心傳親義別序信之大倫相勸勉者其農工商兵則險刻狡猾相傾相軋而鮮知激發天良歸於敦厚其迂謹者畏蕙緘默託於老成免禍而已其俊逸者馳驟於文場藝院汨沒於考据詞賦學爲無用而已若夫強立之儒特起之傑毅然以聖道自任大聲疾呼逢人發蒙始則訕之笑之繼則謗之毀之卒則以其所言不便於己而又無如之何遂誣以

曖昧禁之錮之究其用心必使天下之人知慕勢而不知慕道敢言利而不敢言義羣相率以正學爲忌諱而後快至以正學爲忌諱而後快則人必將入於豺狼鬼域不爲禽獸不止旣爲禽獸則天亦以禽獸待之卽宰割烹炰芟薙而齶切之亦所不恤故以刀以兵以水以火極之火器之烈藥彈之毒不傾刻間萬骨灰燼推其本原皆由聖教不昌所致聖教不昌皆由異學爭鳴所致異學爭鳴皆由教宗未定於一而未能使中國農工商兵無人不以尊孔子爲心之

所致也我

朝舊制歲試入學謁廟文武一體遵行不惟欲使武夫皆知以禮義爲干櫓忠信爲甲冑亦以我孔子神武不殺非惟文之極亦武之至也今武科旣以不切時用奉

旨裁撤若武夫從此不謁聖廟姑無論無以繫屬其心思變化其氣質患將不可勝言亦非我

聖朝右文廣教之至意也伏讀

世宗憲皇帝諭曰黌宮之中文武並列雖經義韜畧所習者不同而入孝出弟則人所當共由也士農不異業力田者悉能敦本務實則農亦士也兵民無異學卽戎者皆知敬長愛親則兵亦士也然則庠序者非爾兵民所當隆重者乎

聖謨煌煌囊括靡遺兵民宜何如遵守惟謹也擬懇 當代大人奏請

皇太后

皇上仰體

先朝右文廣教至意

通諭各省除大中小學堂已行設孔子位遇春秋兩祭每月朔望齊赴行禮外各省武備學堂亦一體設孔子位各地城市村鎮農工商兵亦一體擇一公所設孔子位遇春秋兩祭每月朔望齊赴行禮如是則人人知尊孔子人人知學孔子則人人思學孔子人人學孔子則不惟學士大夫勵忠孝重倫常講道藝免邪慝而農工商兵亦皆爭自濯磨棄邪返正以免於骨肉灰燼之禍共享昇平而天下定矣天下定則天不愛道地不愛寶人不敢侵不言富強而富強皆在尊

聖之中矣然欲尊聖非經

朝廷於時憲書遇春秋兩祭每月朔望增印祀聖謁聖字樣使通國軍民人等一體恪遵著爲成令不足以醒中國億兆之耳目動五洲列邦之觀聽而快昊蒼以萬世之士報我孔子有加無已之至心歷觀列代尊聖之事史冊無不大書特書誠以孔子之謂集大成尊孔子則義農以來之聖人皆在其中孔子以後之聖帝明王名臣碩儒亦皆在其中矣然列代尊聖不過大僚有司春秋致祭朔望行香典禮優隆而自

周靈王庚戌至今光緒壬寅已歷二千四百五十三年春秋兩祭每月朔望通國軍民人等皆須竭誠將敬之鉅典猶未著為令天豈非以我

朝

列祖

列宗崇聖尤隆故俟今日行此曠古未有之盛舉以啟地球

大一統規模也乎欽惟

聖朝敬天愛民凡氣候節令事業云為無不備載時憲書

以前民利用仰見

聖朝敬天愛民無微弗周況我孔子師表萬世

列祖

列宗崇禮尤隆若於時憲書著為成令尤足以上超前代而

下蒸為兆民萬世之風俗也擬懇 當代大人

奏請

皇太后

皇上諭欽天監每年時憲書恭遇春秋丁祭日期增印祀

聖二字每月朔望增印謁聖二字庶幾使通國軍民

人等皆觸目驚心知所遵守而不敢忽如以丁祭典

專宗卷一

禮優隆軍民不得僭用即使僅用黍稷蘋藻竭誠將
敬以示分別至朔望謁聖無分貴賤一體遵行所謂
統攝天下之心思範圍天下之性情消中國各匪之
亂於無形卽以蘇中國億兆之民於無窮者其孰有
過於此乎中庸至聖章稱見而民莫不敬言而民莫
不信行而民莫不悅聲名洋溢中國施及蠻貊舟車
所至人力所通天之所覆地之所載日所照霜露所
墜凡有血氣者莫不尊親故曰配天知卽於我

朝驗之也於戲盛矣或以城市村鎮各擇公所設孔子

位軍民人等皆須行禮有近於褻母亦未讀中庸至
聖章耶夫惟天爲大故凡有血氣者莫不尊親惟孔
子配天故凡有血氣者亦莫不尊親孔子一天也今
請爲中國各匪正告之曰順天者存逆天者亡順之
之義如何亦曰莫不尊親而已凡我中國各匪試平
心思之與其假鬼神以惑人索隱行怪以害己者禍
國何如稱孔子以善世入孝出忠以宗聖者尊

王也伏讀

聖祖仁皇帝御製孔子贊曰清濁有氣剛柔有質聖人參之

人極以立行著習察舍道莫由惟皇建極惟后綏猷
作君作師垂統萬古曰惟堯舜禹湯文武五百餘歲
至聖挺生聲金振玉集厥大成序書刪詩定禮正樂
既窮象繫亦嚴筆削上紹往緒下示來型道不終晦
秩然大經百家紛紜殊途異趣日月無踰彙牆可晤
孔子之道惟中與庸此心此理千聖所同孔子之德
仁義中正秉彝之好根本天性庶幾夙夜勗哉令圖
溯源洙泗景躅唐虞載歷庭除試觀禮器摘毫仰贊
心焉遐企百世而上以聖爲歸百世而下以聖爲師

非師夫子惟師於道統天御世惟道爲寶泰山巖巖
東海泱泱牆高萬仞夫子之堂孰窺其藩孰窺其徑
道不遠人克念作聖大哉

聖贊天下萬世臣民春秋祀聖朔望謁聖當永虔頌不忘矣

謹議

又恭查各州縣學宮左右皆設名宦祠一所鄉賢祠一所忠義孝弟祠一所其外又設節孝祠一所每歲春秋致祭原以榮歿者於既往卽以感存者於將來也今日鄉曲愚氓每思邀福獲利諂鬼瀆神冀倖萬一而奸猾詭詐之徒遂假鬼神能福人利人之說以售其幻始則聚貲燒香久則謀逆伏法是因祀淫神求福反以賈禍何如祀正人崇德卽以徙義也但名宦等祠春秋致祭僅在郡邑而鄉曲愚氓婦孺不獲躬見所由觀感殊少竊嘗在鄉驟執不學士女問以

綱常爲何名教爲何皆呆立四顧不知所答夫既不
知其名又何能行其事乎無怪各省匪徒至今未靖
也併擬懇 當代大人奏請

皇太后

皇上通諭各督撫督學嚴飭所屬州縣轉令各村士民皆
擇本村殷實之家或客舍或閒房兩所於室正中置
几一所設本村已入名宦鄉賢暨本村已旌忠臣孝
子義士悌弟位一所設本村已旌節婦烈婦孝女貞
女位每歲春秋本村士民定期公同前往致祭以本

村之人祀本村之人既不患其不欲亦不患其不專
倘以各村未必皆有著名已歿忠孝節烈士女卽令
查取最近鄰村已歿忠孝節烈士女爲之立位以示
觀感務使鄉曲愚氓婦孺皆知綱常名教觀望興起
感激稱頌手舞足蹈發於至性不能自己然後人倫
明人倫明然後忠義作忠義作然後國勢強孟子所
謂壯者以暇日脩其孝悌忠信可使制梃以撻秦楚
之豎甲利兵者此也近儒有云止沸莫如抽薪遏亂
莫如明倫亦以此也且夫治國之道固必明於人事

尤宜察乎天運竊以皇極經世推之今值渙運民各
爲心逐末忘本如欲挽回世運維持時局鼓良民爲
善之心消匪徒倡亂之禍亦惟有取易渙卦立廟之
意變而通之使民皆知有綱常名教而已此又自強
之本也

擬請山東總校士館暨分校館應課士子每月朔望
各詣本處

聖廟行禮聽講議

王文成公曰古之選士者其才德行詣皆論定於平
日而以時升之故其時有司之待士一惟忠信禮義
而無有乎防嫌逆詐之心也士之應有司一惟廉恥
退讓而無有乎奔競僥倖之圖也迨世下衰科舉之
法行而忠信禮義廉恥退讓之風薄有志之士未嘗
不慨慕乎古道而千數百年卒無以改殆亦風氣習

染之所成學術教化之所積其勢有不可得而改者
也雖然古人之法不可得而復矣所以斟酌古人之
意而默行之者不猶有可勉乎後世之法不可得而
改矣所以匡持後世之弊而善用之者不猶有可爲
乎前升撫袁宮保遵

旨建

大中小學堂凡屬英年俊秀莫不奮然興淳然起咸
歡欣鼓舞以自振於功名復慮年齒稍長之士無所
藉以砥礪實學也乃 奏設校士館所以使多士崇
實學一洗乎帖括辭章之陋習羣蔚爲德行道藝之

全材不但遠超列邦且以收三代上養士之實效焉
乃應課者簡練揣摩朝夕不遑平素纂類經史綴輯
時務臨時剽竊窺易首尾以塗主司之耳目求其所
以無非希圖前列注意膏獎縱其閒不無一二工夫
深純之士討論於平日發揮於臨時然不過議論縱
橫包括宏深求之立身制行能符所言者殆鮮其人
則仍空言而已則仍八比而已況時勢艱難大局危
急人人誦經世之略談時務之策士各著書書各異
見純駁並進是非莫定初學之士鮮不轉移顛倒惑

亂於其中而莫能自主使於此時無術焉以維世教而慎持其終始其患不滋大乎雖自設館以來多士沈研經史通達時務勝於曩日然所貴乎士君子者將以羽翼名教扶持綱常繫千鈞於一髮之危而非徒事乎鴻博已也前升撫 奏明學堂章程首節卽載學堂恭祀

至聖先師孔子每月朔望由教習率領各班學生行禮並由教習宣講

聖諭廣訓一條諸生環立敬聽聽畢退班雖自無識者視若

虛文然其所以繫屬學者之心思範圍學者之性情使其專依歸而端趨向心至苦意至深也擬請山東總校士館暨各府州縣分校士館應課舉貢生監文童朔望亦宜一體各詣本處

聖廟行禮聽講但須躬到無庸強令公服以示體恤屆期執事官先於學門內設點名冊俟值課官到卽行開點不至者卽書不到字樣於本名下以便查考限刻取齊卽由值課官偕本學教官率領舉貢生監文童恭詣

大成殿前行禮畢齊赴明倫堂值課官教官俱升公座值課官恭已坐鎮教官卽行宣講

聖諭廣訓一段或摘取先賢先儒語錄最有關世道人心者愷切講釋如慮聽者擁擠卽分兩班宣講正齋居東副齋居西如以教官年老氣衰不能久講卽由教官延請品學兼優之士代已宣講其講生薪水卽由本館常年膏獎項下核減酌予不必格外籌款然聽講之際若遵成法使諸生鵠立環聽不惟不能耐久亦不易入莫如變通成法或由本館公款撥用或由士

紳現捐買辦木凳數十條安置堂上庶使聽者耐久且覺易入聽者固不得喧嘩獲咎講者亦不得了草塞責忽忽散去講畢聽者各向值課官教官一揖退班尙應課舉貢生監文童查點名簿有連三次不到者取者扣留膏獎一半有連四次五次不到者膏獎全行扣留有連六次七次不到者不准復應月課須由各府州縣官會同各教官先於各處校士館出示曉諭生童使其周知然後認真舉辦務使於評論文藝之中仍寓崇尚德行之意馳逐名利之際復存講

求禮義之心如是

大成殿明倫堂不虛設矣所謂古人之法不可復斟酌古人之意而默行之者猶有可勉後世之法不可改所以匡持後世之弊而善用之者猶有可爲此也然於隋唐至今專尚辭章積重難返之勢尤必偏重德行而使斯人知上所重在此不在彼方足以起一世之痼疾而復三代之隆風夫上有好者下必有甚前之制藝時取清正不數年而清正矣時取豔麗不數年而豔麗矣且不時此來迄今如程朱如陸王如陸稼

書李中孚諸先生一人興起而倡之必有數十百人和之至有不願舉進士而樂就有道者然此猶曰好學者如是也下至兒童牧豎無不感化巨奸大猾自覺愧悔一人之興尙能如是況秉鈞秉衡通省之大凡有教士化民之責者皆如是乎擬請嚴札各教官平日周咨博訪臨時察言觀色其應課生童如有品行端方器識宏遠克敦大倫有功名教者查有實事可據隨時紀錄俟年底開列姓名清單稟牒該管府州縣官上者送給匾額以表其門次者亦賜羊酒以

鼓其志其應課生童如有舞文弄弊恃勢凌人不敦
大倫玷污宮牆者訪有確據隨時傳到申飭勸其改
行違則治以應得之罪以示懲創庶幾應課者知所
勸懲先器識而後文藝自不徒營營於膏獎也本年
校士館每月考課三次首論次策次義法良意美欽
佩莫名但應課者既疲於奔命闕卷者亦厭其太煩
傳曰易則易知簡則易從擬請每月初二日考課一
次論一策一義一不限時刻準其繼燭應課者既樂
其易從閱卷者亦樂其易知擬將每月十二二十二

日兩課裁去生童卽以兩日應課工夫移於朔望崇
禮

先師敬聆

聖諭以爲立人之本值課官教官亦卽以兩日考課工夫移
於朔望表率訓誨以盡作師之責上下兩便文行交
修孰踰是焉且一時之所尙其勢必造其盛唐重詩
賦詩賦莫盛於唐明重制藝制藝莫盛於明今苟重
德行德行亦必且莫盛於今或曰方今風氣尙功利
薄禮義見有講正學者鮮不斥爲迂腐目笑存之上

卽諄諄命之下豈遂能循循然殷殷然遵行惟謹哉
豈知下之所趨端視上之所重向率千百應課者於
謳吟估擘之末而無不應豈因應課者所固有之良
而教以孝弟忠信禮義廉恥之大而反不應乎應課
者卽不爲自修計未有不爲膏獎計者爲膏獎計則
必隨班行禮聽講蘇明允所謂使其前有所趨後有
所避其勢不得不者此也如是其不至者非富厚子
弟不耐勞苦卽非薄禮義不率教者也不耐勞者不
至則寒士益得力矣不率教者不至則異學無從入

矣況士氣旣振農工商兵亦觀感興起皆知親上死
長之義而不爲利害所動乎咸豐之際內訌外患一
時並起

宗社幾及於危曾文正以一書生日與賢士大夫講求道
學故上下一心積久不渝用能削平大難轉危爲安
至於今猶樂道之不惟中國然也昔日本人士德川
憫其國勢阨危風俗頹靡建孔子廟講程朱學由是
民知尊王士敦節義而日本以興噫日本僅得中國
聖教緒餘耳遂能崛起海上爲天下雄泰西諸國莫

敢肆其囑喝要挾誅求奴隸殺戮剝削之故智而與抗顏行況中國涵濡聖教二千餘年山東又聖賢桑梓天下宗望果能及時奮興其收效豈惟遠駕日本且將較同治中興而後來居上矣謹議

切實整頓鄉約議

孟子曰君子反經而已矣經正則庶民興庶民興斯無邪慝矣讀書至此未嘗不爲今日之民痛哭流涕也去年拳匪滋事實由正學不講愚民惑於邪說以至釀成五千年未有之奇變推究其本皆州縣不能切實奉行宣講之故也然在今日州縣亦難過責夫賢若冉求可使爲宰孔子但許以千室之邑如今一邑或十萬餘戶或數萬戶而州縣乃獨以一身治焉豈今州縣之才遠過冉求耶況考試任之刑名任之

錢穀驛站詞訟盜賊又皆任之加以衝途之州縣勞於迎送附郡之州縣困於奔走憂貧救過之不暇而欲其爲民勸農桑而興教化也不亦難乎以故

德音屢下歲及於民而州縣率應以具文鄉民不沾夫實惠卽有一二賢州縣以三年計吏宣講爲首不敢湮廢亦惟於朔望在邑治宣講而已又何能徧及鄉曲哉夫治水者下流通而後上源可得而濬會計者散數理而後總數可得而清今天下之事皆起自州縣州縣之事又皆起自一村村必有塾塾必有師多或

三五少亦一二旣爲塾師必皆通曉文理能勝宣講之人誠於朔望農隙閭村塾師糾眾弟子會同鄉老傳集居民擇一寬敞公所先行宣講

聖諭廣訓衍說農桑簡要兩書俟一年後再由閭村集資購

求宣講拾遺傳家寶農政全書蠶桑粹編等帙總期講時用方言俚語明白易曉俾不學鄉民咸知孝弟廉恥之義耕耘種植之法講畢視其能孝弟力田者獎之其不能者勸之善者三年不懈舉之州縣請給字樣共爲立匾以表其門惡者三年不改報之州縣

記名再三年不改照例充發其有邪說惑民者隨時稟報究辦情親地近耳目易周則好惡公不至任情自恣利弊明不至戾俗失宜卽以一村之師還教一村之人何易如之但窮鄉僻壤書籍既少鄉約之典又久不行非官爲提倡不能踴躍從公教諭者教諭一縣之生童也訓導者訓導一縣之生童也顧名思義責有攸歸光緒二十五年八月特頒

諭旨專責教官躬膺宣講仰見

朝廷勵精圖治之至意嗣是教官宜何如兢兢也誠能不辭勞瘁會同該管州縣出示曉諭各村塾師值此時局艱難惟以激發忠愛講求富教明聖道闢邪說尊

朝廷衛社稷爲第一義然後飭學署役按行各村將塾師姓名一一登冊查畢官卽總核村數若干按村發給

聖諭廣訓衍說農桑簡要兩書俾朔望農隙擇一公所糾眾恭講教官復於每年周歷各村一次察其勤惰如三年中果化導有術閭里殷實案件稀少均由教官詳

明
撫學兩憲彙奏貢生准給七品銜廩生准給八品銜
增生附生監生准給九品銜童生准作僉生儻玩視
鄉約棄置不顧以及借爲塾師武斷鄉曲好惡不公
倒置村民是非者查出不准再充塾師如是則有志
者可藉以奮於功名而不肖者亦知所愧將孟子所
謂治田里教樹畜謹庠序之教申孝弟之義皆可於
今日見之不但若西人所云以農學新法求之中國
之地每年可增款六十九萬一千二百萬兩僅足裕

國課已也然非該管州縣認真考察

大憲認真督責亦不能以收效何也教官率皆年踰
半百血氣就衰不能振作擬請嚴札各州縣會同學
官出示曉諭各村塾師照辦外其勸懲教官之法亦
以三年爲率如三年中各教官果能切實考察著有
成效卽由該管州縣出具切實考語詳明
撫學兩憲奏請訓導陞爲教諭教諭陞爲教授若畏
難苟安無效可觀以及受賄顛倒塾師黑白者亦由
該管州縣聲明

上憲奏請革職如是則教官有所勸畏不至尸位上下相維臂指相使不勞而理不費而惠鄉民以暇時修其孝弟忠信深耕易耨一旦有變自可同仇敵愾聖道賴以昌

宗社亦賴以固矣至若書價

聖諭廣訓衍說約制錢百文山東書局有板農桑簡要約制錢五十文泰安有板爲數旣廉籌辦自易卽札各州縣買備若干轉發教官散給生童如實無欸可籌不妨由縣官教官先行買辦飭役按村發給生童准其

交回原價倘過索分文卽治該役之罪如是則官不至借端推諉良法以寢而生童爲其桑梓出制錢百五十文亦不爲傷財要之在今日民財困乏禮教衰微此事尤刻不容緩蓋爲斯時開一分利源卽爲中國收一分利權並爲

朝廷增一分稅課爲斯時正一分人心卽爲中國培一分元氣並爲孔子存一分血脈也以經世午會之說推之五千四百年當午之中卽屬孔子凡有血氣莫不尊親之時今固已閱四千一百一十八年矣然西

人方航海數萬里不憚舌敝唇焦以宣其教而我反
於孔子之道不急與鄉民講求恐西人將從而笑其
旁矣謹議

欽命

兵部侍郎都察院右副都御史巡撫山東等處地方兼理糧餉
督理營田提督銜節制全省軍務兼理鹽政監督臨清鈔關

張

爲

札飭事案據歷城縣附生江鍾秀稟擬切實整頓鄉
約議一呈到本部院據此除批據稟整鄉約勸農桑
此皆轉移風俗利益民生爲地方常年應辦之事准
卽行司督飭通省州縣會同學官切實舉辦並移會
學院知照惟所請師生三年獎勸姑俟將來是否辦
有成效隨時酌奪着卽知照並牌示外合行抄粘札
飭爲此札仰該司札到卽抄粘轉飭所屬州縣會
同教官認真切實舉辦毋違此札

欽命賞戴花翎五品銜翰林院編修提督山東全省學院尹 爲
通飭事現准

撫部院咨開案據歷城縣附生江鍾秀稟擬切實整頓鄉約議一呈到本部院據此除批據稟整鄉約勸農桑此皆轉移風俗利益民生爲地方常年應辦之事准卽行司督飭通省州縣會同學官切實舉辦並移會學院知照惟所請師生三年獎勵姑俟將來是否辦有成效隨時酌奪着卽知照等因脾示相應咨會等因到院准此合行抄粘通飭爲此牌仰該府文

到立即抄粘轉飭所屬各教官認真切實舉辦倘敢敷衍塞責一經本院訪聞即行叅處不貸切切須牌

欽命頭品頂戴山東等處承宣布政使司布政使胡 爲
通飭事案奉

撫憲札飭據歷城縣附生江鍾秀稟擬切實整頓鄉約議令即刷印原單通頒所屬並各學一體舉辦等因到司奉此合行刷印原單頒發札到該府立將發去鄉約議查收除該府並教授訓導存留若干本辦理外其餘轉發所屬一體遵辦毋違倘所屬州縣學官不肯認真舉行視若具文經本司訪聞定予分別記過撤任不貸該府有督催教化之責幸勿置之高

閣僅以分發卸責了事是爲至要此札

原稟附後

竊維拳匪滋事釀成鉅禍殺戮之慘亘古未有幸賴
兩全權和局告成賠款至八九萬萬山東每年攤還
九十萬各項稅則所由有加無已然推其究竟涓滴
皆出自鄉民若不急勸農桑速興教化恐後日民不
堪命飢寒流離奸黨得以乘閒煽惑其邪說暴行將
有較從前更甚者生一介下士何敢妄瀆但先民有
言天下之大匹夫有責況生夙讀孔孟之書世享承
平之福當此時局艱難不思感發斷非人情邇來拳

匪雖已斂迹但餘教旁門猶方興未艾若照例追究
或至激成事變正不如切實整頓鄉約消患未形溯
道光年間邪教猖獗奉

旨宣講

聖諭一時頗著成效茲查

聖諭廣訓衍說一書註釋明白言言痛快不學鄉民易於曉
諭且教必兼養又查農桑簡要新編一書切實可行
果能照法辦理不難家給人足伏思聖門論政惟重
富教若能存心利物一介之士亦必有濟但生人微

言輕卽或切實講求所濟不過一家揆之欲立立人
欲達達人之量實難相符生日夜籌思得一上下相

維背指相使不勞而理不費而惠之法未知有當似
屬可行昨讀 鈞示有云山東堂奧與人共處礦路
之利盡爲人有恐不數十年民力告竭不可復支現
在建學訓農諸大端罔不卽時振興收回利權庶吾
民尚有舒喘之時仰知 大人以正人心厚民生崇
聖道衛

宗社爲急故

生

敢不揣冒昧肅陳管見如蒙

俯採芻蕘

不以爲謬合無仰懇 大人會同 宗師大人核奪
施行實爲

國家自強之地不惟富教可觀消患未萌卽

朝廷近來變法自強之苦衷當亦爲鄉民所共諒不至
嘵嘵不已矣

整頓鄉約條規

計開

一各村宣講公所卽設本村寬敞書房或設本村殷
實之家寬敞客舍於中恭設

至聖先師孔子位

亞聖孟子位每月朔望闔村塾師會同鄉老糾眾弟子
傳集居民齊赴公所恭詣

至聖先師孔子

亞聖孟子位前行禮畢村人各向塾師一揖塾師卽就

位宣講

聖諭廣訓衍說

御製勸善要言及農桑簡要幽風廣義與一切有裨世道人心國計民生之書皆用方言俚語隨便講說農忙停講農隙或五日或十日一講但非朔望勿庸行禮以明宗主而廣教養

一恭遇

皇太后

皇上萬壽聖節塾師會同鄉老率弟子與居民齊赴公所

望

闕行禮我

朝深仁厚澤累代不及鄂督張制軍勸學篇教忠一節鉅細備載塾師宜錄一通張貼公所隨便講解至光緒二十六年之變賠銀八九萬萬兩山東每年攤還九十萬兩各項稅則之加皆出萬不得已非朝廷本意即變法原為自強亦非輕事紛更塾師總宜將朝廷仁民至意常常與眾解說以泯怨咨而生忠愛

一朔望宣講各書自晨飯後至日中止塾師挨次輪流宣講鄉老居旁坐鎮各塾弟子與居民敬謹聽訓勿得喧嘩如有不遵即由鄉老立行喝退以昭嚴肅而收實效

一鄉約既立大義漸明民教從此自可相安塾師尤宜隨時開導令其各安生理切無猜疑釀成教案上憂

君父下禍身家其餘八卦白蓮等教久懸為禁儻有借端煽惑即由塾師立刻會同鄉老稟官究辦至本村

遇有口角爭鬪細故亦由塾師會同鄉老善為排解秉公調處以息訟端而敦睦誼

一忠臣孝子悌弟順孫義士及烈女節婦孝婦等風化攸關如本村士女有符旌表例章即由塾師會同鄉老併廩增附各生稟明教官牒縣轉詳請

旌間有品高學粹著書名山不求聞達之儒亦由塾師等稟縣轉詳聽候薦舉以維風化而表隱逸
一鰥寡孤獨廢疾仁政所先理宜仰體

皇仁設法周恤即由塾師會同鄉老年底面商本村富室

酌給錢粟無論多寡總宜量力捐輸不可抑派以
哀災獨而廣生成

一農桑所關綦重必須出入相友守望相助方能百
穀用登種植成林坐中樹木尤資蔭庇儻有不遵
鄉約肆意傷害禾苗戕伐樹株卽由塾師會同鄉
老議罰示警違則送官究治以厚風俗而濟民生
一防患未形莫如交查互警共相牽制卽由塾師會
同鄉老每年設立戶口姓名一冊本村各戶大小
男婦皆行登載存置公所以便查閱一戶立一戶

長卽擇本戶年最高者充之十家立一牌長卽擇
十家最殷實且年高者充之闔村立一莊長卽擇
闔村最殷實且年高者充之凡一家思爲不法九
家公勸令止如違卽由九家稟明塾師會同鄉老
送官責懲以消隱患而遏亂萌

一每村各設一倉卽設本村最殷實之家秋收後聽
本村富室量力捐輸積存倉內遇歲歉卽以一村
所積之穀仍給一村乏食之人一切出入悉聽塾
師會同鄉老設簿登記凶年不妨盡用樂歲仍可

捐輸以一村濟一村之眾不慮其不均以數歲救
一歲之歉亦不慮其不足然此原爲備荒萬勿借
貸生息以免紛擾兩息爭端

一村人孝弟力田三年不懈卽由塾師開列姓名清
單呈明教官年底彙齊牒縣給予字樣嘉獎然須
名足副實方能服眾切勿濫請惡者三年不改亦
由塾師開列姓名清單呈明教官牒縣存查然須
確有惡蹟屢勸不改方可稟官示警切無挾怨報
復以慎賞罰而示公允

一塾師化導有術約束有方俟三年畢教官查時卽
由鄉老開列姓名清單面呈教官年底彙齊轉詳
撫學兩院酌量獎勵如借塾師武斷鄉曲好惡不
公顛倒善惡亦由鄉老開列姓名清單面呈教官
不准再充塾師以勸有志而愧不肖

一教官每年輕車減從周歷各村一次塾師卽於公
所敬謹預備如教官以村數過多不能徧歷卽僅
歷著名大村飭役傳餘村鄉老一併考察塾師勤
惰倘教官不克認真察驗應以具文及借端騷擾

尊完齋記
三
鄉村縱容家丁署役苛索財物准由塾師會同鄉
老稟明州縣轉詳然須確有證據不得影射誣稟
以考勤惰而杜貪婪

欽命頭品頂戴山東等處承宣布政使司布政使胡 爲
通飭事案奉

撫憲札據歷城縣附生江鍾秀稟呈切實整頓鄉約
議令卽刷印通頒一體舉辦等因遵經刊刷原單札
發飭辦在案惟思治道之隆替繫乎風俗之盛衰風
俗之盛衰因乎人心而人心之邪正則由於教化成
周盛時州長縣正以下有黨正里胥有鄮長里宰漢
置三老嗇夫皆於一鄉一邑先以善其教導之方而
後天下之治有條而不紊隋開皇年間始盡罷州郡

鄉官之職然明洪熙初年猶詔州縣設立年高德老人勸民爲善是鄉約之急宜整頓必須示以條規口宣面講誠爲不可稍緩之舉亦卽古先王黨正問胥之遺意也總之人無中立之途不歸於正則入於邪漢之斗米唐之末尼大率皆乘政教之微以煽惑人心而四方卒以多難卽如光緒二十六年拳匪滋事擾亂京師波及齊魯亦莫不由於正教之不明遂卽邪說之易惑現當大難初平創鉅痛深之後尤易激發天良挽回澆俗惟有責成地方官會同學官諄諄

勸導務使環而聽者聲入心通疾於感悔本司爲教民化俗起見因將整頓鄉約條規刷印成本合行札發札到該府卽便查收遵照分別存留轉發各屬移會學官在於城鄉各村設立公所責成鄉老及品行端方之塾師每月朔望及農隙之時宣講條規內所指各書周而復始並隨事隨時查照條規多方勸勉務期愚民知所感悟庶足明正學而挽歧趨於風俗人心大有裨益仍由學官定期下鄉周歷各村考察塾師勤惰年底詳報酌量獎勵貶乏學官如不認真

查察視若具文一經本司訪聞定予分別記過撤任
不貸該府縣等官最爲親民職司教養如果實力遵
奉自有成效可觀切勿以迂闊而膜視之是爲至要
此札

原稟附後

竊生於光緒二十七年十二月間謹於撫學院兩署

稟請整頓鄉約旋蒙宗師大人傳署面訓並諭不

妨在家先行勸辦生回家後卽懇生父約請鄉老熟

師遵照原議舉辦本村鄰村皆先擬於本年二月朔

爲始所有宣講書籍生已購買散給昨又蒙大人

訓誨周至生愈不勝感激惟前稟內僅附末議未陳

約規多於利弊未詳合將條規再繕清摺恭呈鑒

核如蒙不以爲謬仍乞與生原議一併通飭各府轉

尊宗資義

三

札各州縣刊印移學每村發給一冊嚴示照辦不惟
生感戴無既卽全省鄉民亦同深慶幸矣

擬請通飭各州縣慎選約正嚴催各村鄉老塾師按
照已行頒給鄉約條規認真舉辦以安民教議
道咸以來海禁大開

朝廷熟悉時勢加意睦鄰通商傳教載在約章士大夫
讀書明理咸知懍遵至鄉曲編氓足不出里巷目不
識文字中國各省強弱衆寡相較彼尙不知中外相
較更無論矣彼又何從而知弱不敵強寡不敵衆乎
以故

朝廷嚴刑峻法禁止攻教而我民嫉視遠人如故歧視

教民如故教案抵償賠累仍如故胡文忠每讀詩至
哀我矜寡宜案宜獄輒掩面涕泣不能仰視有以哉
孟子曰赤子匍匐將入井非赤子之罪也當此而不
思善爲開導婉爲勸諭而徒嚴刑峻法以畏之豈惟
無濟且將滋甚何者鄉民不知時勢以爲

朝廷何愛遠人而反虐我民也其怒益奮教禍用愈烈
教禍愈烈交涉用愈難勢必至決裂不可收拾譬之
治水不先去其淤塞蕩其泥沙而徒厚隄崇坊以禦
之恐一旦有隙可乘將潰敗四出而不可復制然則

此時與其畏之以刑民與遠人相猜益甚何如教之
以道民與遠人永遠相安也卽如

鍾秀

前所擬鄉約

議暨條規州縣果能認真舉辦自可永泯此患但思
大縣統轄或百餘里分小縣亦數十里分村落林立
戶口星羅若徒恃教官稽察不亦率教官而路乎擬
請嚴飭各州縣於各里分慎選總約正一人副約正
三人如慮無人承充卽飭各里地保擇各里家最殷
實且年高德邵者四人將其姓名開單呈縣俟縣官
會同學官定期按單傳人一齊到署隆以禮貌許以

頂戴并給告示一紙約規一冊令其還鄉督催各村
鄉老塾師傅抄一分黏貼板片懸掛公所認真照辦
如縣官以案牘煩難日無暇刻即將告示約規刷印
移學准專由學官面諭承充然須先由縣分期飭役
按里照單傳人到學民方聽從不然決不能行蓋縣
有權而學無權也夫所擇約正家道殷實則無衣食
累始能專心爲善年高德邵則爲鄉人重方可出言
皆從計大里或數十村小里或十數村劃分四段約
正四人各就最近鄉村每月朔望挨次稽察如以約

正年老步履艱難一日之間不能徧察本段各村卽
可二月朔稽察東村二月望稽察西村三月朔南村
三月望北村周而復始勿怠勿荒各村旣各設公所
又須於總約正本村公所兼爲全里總約公所凡公
所皆用鮮明板片書某村鄉約公所某里總約公所
字樣高懸門外使人周知各里各村皆限五月一律
辦齊違則約正是問教官每年稽察卽僅至各里總
約公所傳集約正以便辦公三年期滿各約正會同
鄉老按照條規預行開列各村塾師勤惰姓名清單

尊宗齋議
各村塾師亦照條規預行開列各村居民善惡姓名
清單俟教官查時共赴總約公所一併呈明如是則
以民治民教官不勞而理矣雖然又有慮者患在上
施而下不應則上亦窮於無可如何而良法以寢閒
嘗靜思世人所以不敢從公者一爲公身則官私之
害皆叢於一人之身是以人憚爲之擬請通飭各州
縣先行明白出示曉諭約正之舉原以嚴催各村鄉
老塾師按照頒發鄉約條規認真舉行以昌正學而
遏亂萌設有不遵約規鄉村卽行嚴催速辦違則指

名稟縣責懲其三家小村無人宣講卽使附鄰近大
村以免向隅至宣講書籍名目多端務由約正勸各
鄉老塾師隨時購買爲費無多收效甚鉅倘慮鄉約
之廢已久驟行整頓各村居民勢必羣疑共笑膜視
鄉約每月朔望未必卽赴公所行禮聽講卽由約正
諭各村鄉老塾師公立罰規除從西教回教道教釋
教及奔走謀生貧民聽其朔望不赴公所行禮聽講
外其各塾學生如有無故三次不到者公議嚴罰其
師其無事家居富民每屆朔望各戶亦須一人前往

公所行禮聽講違則議罰卽作爲公所書費茶資此外地方他事皆地保莊長首事是問概不累及各約正一不票仰協拘人犯二不准差役到家飯食三不准原被告指爲證作四不准命盜案件牽連姓名五不令督催錢糧惟朔望稽察本段各村鄉約事宜設此後地方卽偶有兇徒頑夫滋生事端仍由縣照常辦理均與約正無涉并與各村鄉老塾師無涉蓋以堯舜盛時尚有四凶也歲抄州縣官卽欽遵鄉飲

盛典傳請約正赴學宴會親爲舉觴以答其周年奔走勸

諭之勞如約正距邑稍遠不至者聽三年之久如果所統各村地方平靜訟獄減少州縣卽行親製匾額鼓樂喧送以表其門果爾則有百利而無一害人未有不樂爲者也善乎陸世儀之言曰治天下須用幾賢督撫治一省須用幾賢縣令治一縣須用幾賢鄉長鄉約爲綱社倉保甲社學爲目鄉約者約一鄉之人而共爲社倉保甲社學也社倉足食保甲足兵社學民信許多條理都在鄉約一日討論不然徒於人跡湊集之處宣講幾句空言無論講者以泛泛與人

素不相識之身人多不聽不能執人人而語之即使
人聽鵠立片時往往厭去且無賞罰勸畏之人亦遷
善不勇而改過不速何如各村徧立公所設孔子位
買辦木凳安置公所每月朔望敬謹行禮安坐聽講
卽以本村鄉老塾師統本村居民以本里約正統各
村鄉老塾師臂指相使約束自易也子曰道之以德
齊之以禮有恥且格此之謂也竊知五洲列邦聞之
當亦動色相告曰中國今日鄉曲愚氓咸知有教宗
矣教化旣明權勢自強非復前日無教之可輕也中

國其日有起色乎況山東鐵路瞬息告成遠人麇集
尤不可不急爲措施以安我民而保遠人也謹議

擬請特設全省鄉約總局議

孟子曰舜使契爲司徒教以人倫父子有親君臣有義夫婦有別長幼有序朋友有信而又慮其無所從事也復引堯勞之來之匡之直之輔之翼之使自得之又從而振德之言以示之法而授之途聖人之於教民如此其迫切也況三代以還王道熄霸術猖聖學晦邪說橫時至今日滅棄綱常非薄禮義至有視其父子兄弟如仇讐者人心滅絕淪於禽獸乖戾之氣積爲刀兵循是不變人類且幾乎息而謂教化一

端猶可不仿舜之微意急設專官以總理其事乎昔者光武詔鄧禹亦引舜之言曰百姓不親五品不遜汝作司徒敬敷五教在寬自古帝王固未有不汲汲於教化者也近十年來東省大員憂時孔殷設商務局設洋務局設工藝局設機器局誠以時勢至今非此則一日無以自立也況教化尤爲今日急務中之急務乎卽如庚子拳匪擾亂京師

乘輿播遷震動大局亦莫不由正學之不明遂卽邪說之易惑尤可恥者拳術之興肇自東境老團之說傳

徧寰瀛此在山左聖賢桑梓尤當引爲愧憤而急振興孔孟正學爲各省倡以雪前日莫大之恥而爲後日最善之圖也古語有云見兔而顧犬未爲晚也亡羊而補牢未爲遲也當此和局已成之際正吾華修明教化之時擬請設全省鄉約總局凡各府州縣鄉約事宜皆徑由局札飭督催其如何舉辦之法鍾秀前所擬切實整頓鄉約議暨條規已幸蒙刊印頒行各府州縣矣請卽由局查其已照行者卽行札獎益矢奮勉其未照行者卽行札催限期辦成稟覆俟一

律舉行卽由局每府札派一員往驗稱職者賞溺職者罰但鍾秀前所擬約議約規不過舉其大畧至如何潤澤如何措施皆由各府州縣隨時隨地斟酌至當稟局核辦其餘上憲無須再稟以省案牘近時印官案積如山終日披閱不窮凡事皆有文無實弊正坐此若使徑達總局州縣自可以其餘閒切實用心於民而民之受其賜者多矣設總局更有良法美意亦須隨時札飭使屬僚有所稟承務期凡民均沾教澤每屆歲抄由局詳明撫學兩院以課其成如是則

事有專責而實效可收矣至如何設置局員局書以資辦公之處在上憲臨時自有酌度非下學所敢預言此實創鉅痛深之餘懲前善後者所當加意也猶憶庚子秋愚民至伏法時猶嗚咽涕泣自鳴其忠義不休可識忠義乃民性所固有特恨其惑於邪說而誤用耳夫奸民出於私包藏禍心雖誅之何足蔽辜而愚民出於公勇而無識陷於歧途身受誅戮累及閭里此固終古不白之冤而識者所由每念及此輒太息痛恨於鄉約之廢也我

朝雍乾盛時鄉約一端處處實力舉行凡民莫不聞孔孟正學焉義理既入於人心自不迷於邪途而承平日久人心漸弛鄉約廢而不舉遂致蚩蚩之氓不得沾濡教澤手足無措貿貿然莫知所從而奸民乃得乘間假鬼神以肆其毒我

皇太后

皇上燭照無遺預防其患特於光緒二十五年八月明降諭旨專責教官躬膺宣講以昌正學而愚民又甘心從邪釀成庚子之變者則以教官宣講僅在邑治而窮鄉

僻壤仍無人格遵鄉約

盛典每月朔望齊集居民宣講

聖諭使民皆得所宗故也有子曰因不失其親亦可宗也夫生民以來之可宗者其孰有如我孔子哉宗之則必事之事之則必學之今日愚民每好事神請卽因其事神之心轉而導之使之事我孔子事孔子則志在孔子志在孔子則學孔子學孔子則事親孝事君忠各業其業各事其事安布帛菽粟之常遵蕩平正直之化而後日無窮之教禍夫固不煩一兵不折一矢

而已消滅於今日區區設總約局總辦全省鄉約之一事矣孫子曰善用兵者無赫赫之功唐太宗曰治安中國外人自服不然徒和光謙德交歡遠人愚民無知動釀鉅案彼索直仍毫末不讓亦何濟哉蓋國之強弱視乎教化五洲權力最強之國皆五洲教化最優之國也彼西國所以強者教化爲之彼教化所以優者國內廣設教堂爲之中國各省果皆力行鄉約城鄉村鎮各設公所立孔子位凡民莫不崇事焉雖無西國教堂之名而有西國教堂之實矣況中國

固義農黃帝堯舜垂教最古之國而山東又孔子篤生之地自昔稱爲文明五洲萬國所共讓弗如乃自拳匪構亂泰西各邦動以野蠻無教目我笑我玩我輕我痛恨唾棄幾至置我於不齒凡我中國士民若再玩愒怠傲不思欽遵雍乾

盛典力行鄉約宗事孔子將不惟我中國

君師在天之靈痛我惡我卽西人亦斥我爲冥頑不靈矣謹
議

切實稽察鄉約議

有子曰其爲人也孝弟而好犯上者鮮矣不好犯上而好作亂者未之有也孟子曰道在邇而求諸遠事在易而求諸難人人親其親長其長而天下平誠以爲治貴握其本也不然徒言變法不言變俗是猶向眇者而耀以瀛海之景向聾者而震以鈞天之樂非不美也未去眇聾之患而遽進以瀛海鈞天之觀聽終無益也豈惟無益患弱疾者不先尋其病原培其元氣而遽投以大補之劑恐氣雖暴強而本益虧藥

尊宗齋言
四
之反以害之也不大負醫者立方之苦心望愈之至
意乎然則將如之何而可也曰欲自強必先固民心
固民心必先興教化興教化必先切實整頓鄉約何
者海自水始山自石始天下自鄉始禮有鄉飲禮鄉
射禮鄉先生鄉大夫管子有鄉長鄉師鄭人有鄉校
卽今西國每七日必有人焉約其鄉民耳提面命之
揆其致強之本實由於此至我今日教化不過一二
官吏每屆朔望在城治宣講而已其鄉曲富室大家
力能延師者亦不過教之作文識字希圖名利而於

親義別序信之實行忽焉若蓬戶華門無力讀書之
貧民則自幼至老未聞有教之者宜民不知鄉三物
爲何事也孟子曰飽食煖衣逸居而無教則近於禽
獸飽煖且然況食不飽衣不煖之民乎飢寒所迫後
義先利又何怪焉曩者甲午之役西報嘗謂吾民以
數金錙銖之利遂使其國辱地敗師其明徵也故自
強必先固民心固民心必興教化興教化必先切實
整頓鄉約然切實整頓鄉約非經

朝廷切實稽察嚴立賞罰責成各省督撫督學轉飭教

職曉諭生童各在其本鄉切實舉行違則一經查出
卽停其本鄉科歲考試一次不能免具文故事之弊
而收勞來匡直輔翼振德之實效也況教化一端督
學校之督撫尤當加意乎恭讀

世宗憲皇帝諭曰朕欲四海之大萬民之眾皆向風慕義革
薄從忠故特簡督學之臣慎重學臣之職欲使自上
而下端本澄源以收實效也凡爲學臣者務使持公
秉正宣揚風化於教官之稱職者卽加薦拔於溺職
者卽行叅革

聖謨煌煌德行文章原兼容並包但習俗所趨偏重詞章督
學專事衡文教職亦視風俗爲不甚急之務遂至士
舍德行專講文藝而羣黎百姓亦無從聞善言見善
行以至天下成爲今日邪說詖行淫辭之天下也夫
自魏晉至今偏重詞章之勢已極勢極則返我

朝敬天崇聖冥冥默佑夏后商周之盛當復得見天故
重投艱難以迫我悟我而使我不得不黜華崇實然
後教化比於三代而富强甲乎五洲擬懇

奏請自今各省督學皆明加以督辦全省教化事務

尊宗賢議
銜使之觸目警心勿再偏重詞章而置德行於不問
各省督學卽於按試各府沿路偶行暗查或於接見
該管府州縣時明訪鄉約一事該管教官曾否督飭
生童認真經理如稱職者卽如

世宗憲皇帝明諭卽加薦拔溺職者卽行叅革風聲旣樹聞
者知懼督學不過於沿路及接見地方官時偶一暗
查明訪而教官各愛其功名勢不得不皆振刷精神
力求稱職如以偶行稽察所遺尙多恐教官仍存僥
倖不免懈弛然前固已云設全省鄉約總局以助督

學所不及矣又何患所遺尙多乎如是而鄉約猶不
行行而猶不收實效者未之有也勝朝末際士氣浮
誇

國初務示裁抑詎意患出所防弊生於矯士氣旣懦風
俗益下昔講氣節今講貨利昔慕高尚今慕逢迎苟
可以獲利不復計及禮義苟可以進身不復計及廉
恥近年海疆不靖有敗無勝非盡中土器械不利亦
由鄉約旣廢平素教化不修以至敵人臨時得以利
誘吾民而行其反間然修明教化以勵吾民則又在

朝廷注意於是使天下知
朝廷所重而共切趨向溯我

世宗憲皇帝朝嘗命儒臣出爲觀風正俗使故其時四海豫
樂追美成康

先朝盛典萬世行之無弊擬懇

奏請卽於三年大比時

欽命正副試官兼充正副觀風正俗使正副試官於典試
畢卽將考試事宜先行

奏聞正副試官卽輕車減從分巡各府認真稽察如

經過地方閭里平靜風俗純樸准由試官回京卽將
該省大吏有司請

旨特施獎勵如經過地方閭里擾亂風俗浮囂亦准由試
官回京請

旨嚴行申飭然試官於分巡稽察之時又必舉一二善惡
尤甚者親賞罰之以宣

朝廷之德意而動當時之聽聞遇有操守經濟超越尋
常之吏卽行特薦閒有德行學問超越尋常士庶與
異常苦節貞孝婦女亦欽布

天子德音飭地方官或頒幣帛或賜羊酒使其得邀
盛世之光寵爲千秋之佳談賞一人而天下知勸遇有貪
官酷吏或被控有案或聲名惡劣查有確據卽行特
叅其有異常惡生土棍與悍婦逆女訪查已確卽飭
地方官就地重懲之使知王法森嚴罰一人而天下
知懼倘試官經過地方多端騷擾縱容家丁差役苛
索財物執有確據准由該地方官立稟學政督撫
奏叅設有私受地方等官賄賂濫行薦舉所求不遂
任意題叅等弊一經查出卽將該試官治罪如以試

官兼充此職有礙考試事宜卽

特簡居心忠直持躬清廉儒臣出爲觀風正俗使俟屆三
年每省

簡放一人認真巡查查畢卽行回京不得逗留遲延擾累
地方計

欽使不過三年巡查一次而巡查又不過執其大綱而
各省大吏有司皆思邀

天子之寵命亦勢不得不皆振刷精神治益求治於是天
下之壅塞從此開於是天下之渙散從此聚於是天

下之師儒從此尊內外相維大小相制誰復敢視爲
具文奉以故事乎堯典平章百姓協和萬邦大學在
親民歷代詔舉孝廉遣使問民疾苦胥是道也或謂
方今外侮交乘時勢孔急何暇及此不急之務豈知
後人萬不得已之時前人已萬不得已之策子貢
問政一曰不得已再曰不得已而子則曰去兵去食
不曰去信聖人豈迂闊不識時務哉誠以去信則無
世宙也今日時勢雖不富强然猶未至去兵去食之
時也胡爲可先不講民信卽今

朝廷或整頓舊政或變通新法雖名目多端而括其要
不外聖人足兵足食二言然則旣不能外聖人所謂
足兵足食獨能外聖人所謂民信乎而或者乃謂何
暇及此不急之務毋亦未讀子貢問政章耶嘗聞君
子貴挽氣數不任氣數以易考之今值渙卦渙則必
萃乃濟萃則天下同心眾志成城其小人則各安其
農工商賈之事業而日以孝友睦婣任卹相推勉其
君子則心存

君國志在匡濟而只以禮樂兵刑相講求扶綱常衛名

尊宗資義
三
教爲已任行見由近及遠由中及外本立道生萬國
莫强矣豈非我

國家億萬年之鴻庥哉謹議

原稟附後

竊生於光緒二十七年十二月間爲切實整頓鄉約

一事具稟在案嗣蒙 施行生益感激奮發惟前稟

尙於利弊未詳生在藩署復擬約規十二則已蒙

方伯大人核妥刊印通頒凡屬士民莫不銘感惟生

伏思 大人及今 方伯大人在東竭力整飭閭省

教職當無不遵恐一旦 陞任則又成一具文故事

矣抑生又有進者山東孔孟桑梓固應極講正學以

洗光緒二十六年拳匪老圃之恥然較天下猶屬一

隅揆之欲立立人欲達達人之量仍有未盡恭查雍正年間有專責成督學教職宣揚教化

聖諭又有儒臣出為觀風正俗使

盛典萬世自宜永遵生一介下士何敢妄議惟生伏見今日

朝廷力圖自強凡可以延命脈而振衰弱者罔不即時

舉行況生所陳因利而利並無煩擾之弊籌款之難

竊意

朝廷必樂垂察素論大人及今方伯大人皆以正

人心厚民生為急務凡有利社稷雖邇言亦採擇施

行又值宗師大人提倡正學崇尚實行以扶綱常

厚風俗為已任故生敢不揣冒昧肅陳管見如蒙

俯採芻蕘不以為謬合無仰懇大人會同宗師

大人核奪據奏實為

國家自強之本不惟風俗從此轉移即將來我孔子凡有血氣莫不尊親之盛亦於此基之矣

救貧議

或有問於余曰今日中國之大患在貧其他皆緩子亦有救貧之一策乎曰中國富方甲天下何患於貧或曰

朝廷異常焦勞各省督撫大吏日夜不遑非以無計籌欸乎子何謂不貧曰余據大學言謂今日中國不貧大學云有人此有土有土此有財聞自古人主患有無人無土者矣未聞有有人有土而患無財者中國以人則四萬萬以土則二十三行省人眾矣土廣矣

何患乎無財或曰今日中國何以若是其拮据耶曰今日中國之貧在徒以有盡之財爲財而不知以無盡之財爲財也或曰何謂有盡之財何謂無盡之財曰有盡之財金銀銅等幣是也無盡之財戶部廣出鈔幣是也或曰好實而惡虛者天下自然之情也趨實而避虛者天下自然之勢也金銀銅等幣實也又天地自然之貴也天下共好而共趨之鈔幣虛也又列代之弊政也天下共惡而共避之天下共惡共避之所在雖嚴刑峻法不能強人以必從曰子言誠是

也然苟使本國之人購本國之貨非鈔幣與金銀銅等幣參半行使不足以爲功則天下又將移其共好共趨於金銀銅等幣者半移於鈔幣非人之好惡趨避有時異也勢使然也何者天下之大命在布帛菽粟宮室器械鈔幣固不可禦寒禦飢禦風雨禦患難金銀銅等幣亦不可禦寒禦飢禦風雨禦患難也苟以爲國寶通行國中金銀銅等幣固可以權物價鈔幣亦可以權物價是二者體異而用同也今外人涎我者金銀耳若行鈔幣以本國之鈔購本國之貨自

相流轉可強無用爲有用外人雖盡括我金銀銅等幣而不能損我中國之富中國人無恙土無恙卽財無恙也何至有人四萬萬有土二十三行省而猶日日患貧哉或曰其如不能暢行何曰有金銀銅幣相輔則可暢行無金銀銅幣相輔徒以鈔幣相周轉則難暢行中國近年雖甚患貧然藏富於民各省富紳大商金銀銅等幣之積尙廣若嚴禁中國商民銀行錢號私出銀票錢帖而戶部獨出鈔幣固爲以國之鈔幣助民之金銀銅幣以民之金銀銅幣運國之鈔幣以虛助實以實運虛相輔而行非徒用鈔幣也或曰其如無限制有妨

天子以富御貧之權何曰約中國每年賠洋欸若干還國債若干卽造鈔幣若干以相敵此外決不濫造一紙明示於民永昭大信卽如本年春間各省房捐等項所在激成禍變幸

朝廷兵力尙厚得以削平然庚子和欸三十九年方能償清近二三年中民迫於

朝廷兵威尙可撤東補西竭力供應若復數年搜括靡

遺羅掘已盡民將何以奉

朝廷

朝廷將復何恃以立國乎兵法有云實者虛之虛者實之查庚子和款八九萬萬各省每年按數攤還是實者既虛之矣爲今之計莫如使虛者復實之如山東一省每年攤還九十萬兩擬每年春間卽由山東藩庫購極精之器沾極細之紙取古今中外製鈔極密之法造鈔幣若干務約與九十萬相敵製成先由本司蓋印立案再由巡撫具咨解之戶部立案蓋印印

畢仍發本省巡撫酌留辦公外餘勻撥各府州縣官及學官以爲興學訓農通商惠工練兵治河救急卹貧賞善獎能各局各事經費至各項支消若干年底仍由各府州縣官及學官繕冊一一呈明以防中飽所謂取於民仍還於民也各省若能一律仿行其益不滋大乎或曰行鈔必儲成本不然民不信不信民弗從曰商民設立銀行錢號欲出鈔幣必先儲成本者以商民銀票錢帖乃私幣非國寶也且非通國之寶也此處可行彼處卽不能行故必先儲成本而後

可出鈔幣若戶部出鈔是通國之寶也與金銀錢無異凡爲中國統轄者無人無地不可行使又何必設成本乎或曰其如居中國之洋人不使何曰准洋人持中國鈔購中國物卽與金銀銅幣同不准華人故意不使難之者曰其如沽洋貨還洋債賠洋欸不使何曰鈔固與現有金銀錢相輔而行非祇以鈔爲國寶也以現有金銀錢沽洋貨賠洋欸還洋債以鈔本國自相流轉固並行不悖也況各國與我通商多以本國物產不足仰給於我苟持中國鈔購中國物卽

與金銀銅幣無殊彼且將於沽貨賠欸還債項內半使我金銀錢以運其本國半使我鈔幣以爲購我中國貨物計也果爾是舉賠欸八九萬萬而減其半也是中國雖失八九萬萬而仍未失也或曰其如多假冒何曰不准中國商民銀行錢號私出銀票錢帖凡鈔幣無戶部印本省藩司印者卽係私造查出究其來源確係何人卽立置何人於法況王中丞條陳中已有防民僞造之法乎或曰其如奸民僞造印信何曰天下事無論如何機密必有知者設有發其奸者

立刻破格賞給職銜金帛以示鼓勵或曰其如易朽何曰有倒鈔之法在或曰其如中國商民完糧納稅盡用鈔幣

朝廷所得皆是無從羅致金銀等幣應付賠款何曰凡商民完糧納稅須銀幣與鈔幣參半方准完納設盡用鈔幣即不准行

朝廷即以所得銀幣應付賠款即以所得鈔幣爲本國各項廉俸各項兵餉各項賑濟各項度支之用或曰其如數年後鈔幣日形其多金銀錢日形其少何曰

中國五金之礦甲於五洲特無貴本開採故爾見絀今即以鈔幣爲貴本設法開採數年後將金銀錢亦日形其多又何憂其少乎日本明治三十六年計金銀銅六千餘萬紙幣八千餘萬雖其數既浮民尙利之噫日本凡物仰人之國耳尙能行使鈔幣況我地大物博無求於人之中國乎或曰金元明行鈔不過百年美國行鈔不過五十年中外皆爲弊政此決不可行者也曰即云金元明不過百年美國不過五十年然此不過僅爲三十九年賠款起見以急濟急而

非卽以是爲經久之計也或曰不害三十九年以後之民乎曰本年春間以賠款之故激成禍變兵民兩敗俱傷若再循是不知變通其禍恐將不堪收拾不害三十九年之中之民乎我

朝培養深厚億萬斯年若虞鈔幣將朽則倒舊換新以是遞傳可至萬年將永爲世寶也何謂害三十九年以後之民乎況卽以金銀錢爲天地自然之貴鈔之勢萬不能久與相輔而行竊知今日中國風氣已開學堂已立他年礦學化學有人金銀錢幣將日出無

窮何難復收其虛而給以實也總之此策在未與各國通商以前則決不可行行則害民此策在既與各國通商以後則決不可不行行則利民何也各國欸關求市其意蓋謂以我無盡之物易彼有盡之財財盡則力竭力竭則中國無以自立然後可以歸我掌握而聽我役使果能行使鈔票彼之物無盡我之財亦無盡中國有人有土卽有財夫然後各國無所施其以商戰我以貧亡我之毒計而我反得盈餘試問今日救貧之術尙有逾於此者乎

安遊民議

孟子曰無恆產而有恆心者惟士爲能若民則無恆
產因無恆心苟無恆心放僻邪侈無不爲已及陷於
罪然後從而刑之是罔民也讀書至此然後知教化
可行於有田有業之民而不可行於無田無業之民
也夫民啼饑號寒而使其孝弟忠信禮義廉恥雖堯
舜亦無以爲功伊周亦無以爲力況其下焉者乎孟
子又曰廛無夫里之布廛之設所以處游民也布之
罰所以驅游民使業廛也古昔盛時位游民有地教

游民有方游民之多寡有無官皆預知其數而措置之故其時教化盛行刑措不用今則游民日眾賭博出其中酗酒出其中狗偷鼠竊出其中爲盜爲劫聚眾作亂亦出其中推其本實由州縣不知其多寡有無而預置之所致也今欲整頓庶務廣行教化亦惟有先安游民而已矣擬請嚴札各州縣先行明白出示曉諭游民令勿疑懼赦其前愆許其自新再飭各里地保立一游民姓名清冊查明該管各村無田若干人無業若干人除無田爲佃戶無業爲傭工爲僕

役爲阜隸爲優伶一切能自謀衣食無庸查明登載外其無田無業賭博酗酒狗偷鼠竊者將其姓名一一登冊查畢報縣官卽親核人數若干計大村不過三四人小村不過一二人仁里或并無此天下有其人甚賤其力足以爲亂散處不見其多聚處已見其夥者此輩是也安之之法惟有各州縣欽遵上年

諭旨

立巡警軍取法江省立工役院而已或擇地新建或因舊有房宅規模旣具卽派所屬縣丞等官領其事復令地保執前名冊按行該管各村面諭游民視其

狀貌魁梧強悍好戰者勸令赴巡警軍處報名州縣
卽各視其地之款項盈絀以定人數多寡按月發給
工食延聘教習認真訓練平時旣藉以捕盜變時亦
藉以殺敵旣有身家可稽不患其逃亡亦勁旅素練
不至臨時現行招募其游民之愚魯平常者地保卽
勸赴工藝院報名如各州縣官僉以工藝院資本重
大舉辦不易准由各州縣官商請本地富紳大商量
力捐助局中製成貨物發售除提還料本外其一切
局中經費皆由此出俟學者技藝粗通卽由局酌給

微資遣出聽其自謀生業不數年間工藝大興貧民
不患謀生無術矣至無田無業之鰥寡孤獨廢疾實
係無人照顧異常困苦者亦准地保查明照例發給
孤貧糧仍責成本村富室常常顧卹其賭博酗酒狗
偷鼠竊者或因無人管束或因迫於飢寒一旦父母
代謀其生計並赦其前愆未有不感激樂從者卽或
習於放廢不就範圍致罹法罔是彼自外生成州縣
仁民之心已盡又何憾焉或以一州一縣經費有限
一州一縣游民實多安之實不勝安卽不妨先擇其

尊宗賢議
異常强悍好戰者令充巡警軍其貌清性靈者入工
藝院其餘好言撫諭暫行罷去仍責成地保勸諭其
鄉村富室攤集微貲予爲工本使其藉以糊口或肩
挑或手推萬不可俟其爲盜爲劫然後從而刑之俟
其聚眾作亂然後從而勦之也此實今日整頓庶務
廣行教化之要務也謹議

安客民議

嘗推易數凡一十二萬九千六百年爲一元其一元
之半於時值午之中於易值卦之鼎卽全球一家萬
國一人之時然環輿數十兆程非一日千里之輪舟
鐵軌何以捷往來大小數十百國非呼吸千里之電
綫德律風何以通文報或教化異旨或政治異體或
風俗異尚或寒暑異時非言語互解文字互通商賈
互往君相互交何以成全球一家萬國一人之宏謨
彼拘墟者囿於方隅之見輒謂中外宜各主其國各

子其民不相往來抑何昧於天地自然之運會也百
十年來歐洲諸國由印度而南洋由南洋而中國闖
入邊界腹地凡前史所未載亙古所未通無不來我
中土通商傳教合地球東西南朔數十萬里之遙胥
聚於中國此卽全球一家萬國一人之始基也何者
天道不極盛則不衰地道不極長則不消人道不極
文明則不晦昧是故輪舟鐵路以捷往來電綫德律
風以通文報驅風駕電警鬼疑神豈人之智所能爲
哉天爲之也天欲藉此法物以成地球一統之盛也

天欲成之誰能阻之乃各國在我中國旣已廣設領
事教堂護兵以符天地自然之運會而我在各國至
今猶未暇及此豈惟中國之治尙有所闕各國之心
猶有未滿抑亦天意所不欲也然則中國將如之何
而可也曰一在各國廣設領事卽命駐各國使臣兼
之務由使臣立一編審華民清冊所有僑居華民姓
名悉錄其上年底登下其死生察其善者賞之惡者
罰之凡一切交涉事件皆可與各國據理直爭每年
中曆正月朔旦及恭遇

皇太后

皇上萬壽聖節務各聯絡一處敬謹行禮慶賀以生忠愛之心如是則各國華民不至忘本國而受他人之籠絡矣一日在各國廣設孔子教堂孔子之道參天地贊化育大中至正卽在各國亦無有非議之者每遇中曆月之朔望華民務齊赴孔子教堂行禮畢卽由品學兼優者擇論孟學庸易書詩禮春秋之最切世道人心者愷切講釋使人咸喻設各國人民有願入教者尤須格外優獎多方誘掖訓誨娓娓不倦使其

易入馴至愈推愈廣他日我孔子凡有血氣莫不尊親之盛卽於此基之如是則各國華民不至忘聖教而入他人之藩籬矣一日在各國廣設護兵夫兵強則國尊古今通義雖各國待禮華民甚優無須設兵保護然本年春閒在美華民固已寄稟中國設法救援矣又何得漫不加意乎中國亦宜在各國設置護兵以壯華民聲援如是則華民不至無依而受他人苛虐矣或曰其如各國不准行何曰公法內有人民僑居異邦保護之例如之何其不准行卽云各國待

禮華民甚優非如中國無知愚民仇視外人護兵可
從權不設而領事與孔子教堂則萬不可不設也或
曰其如中國不在公法何曰彼以此施於我我卽以
此施於彼彼亦無辭折我或曰其如中國

國家經費不足何曰請以各國華民之財卽治各國華
民之身何者華民之在各國其人類皆曉暢洋文諳
悉土語而富商大賈亦且參錯其閒富者十之三四
其次亦不至極貧一旦聞中國設立領事以撫綏之
設立教堂以訓誨之彼必喜出望外踴躍爭先捐輸

卽責以常年供稅亦未有不俯首聽命者尙何慮於
經費不足哉且夫中國在各國廣設領事教堂非僅
可以統轄華民維繫華民已也且將以在外者牽制
乎外而大愈於以內制外也以在外者聯絡乎外而
大愈於以內聯外也不然各國華民將數典而忘其
祖中國雖欲策使之而已不復可用矣是何異舉數
十萬之爪牙腹心拱手而讓之他人也孟子曰諸侯
之寶三土地人民政事竊知

朝廷仁及海外必不肯舍此數十萬遠民拱手而讓爲

尊宗養義
他人之爪牙心腹也謹議

養氣議

自強以養氣爲先天之所以位乎上而不敗者氣也
地之所以位乎下而不敗者氣也人之所以位乎中
而不敗者亦氣也積人成家積家成鄉積鄉成國積
國成天下天下之人而奮興鼓舞爭自濯磨則其氣
振氣振則強天下之人而淹抑消阻相與悲歎則其
氣餒氣餒則弱弱則急爲補救速爲振作使氣旣衰
而復盛旣墜而復興不難轉弱爲強有天下猶運之
掌夏之少康周之宣王漢之光武是也孟子曰我善

養吾浩然之氣蘇子曰是氣也寓於尋常之中而塞乎天地之間卒然遇之則良平失其智賁育失其勇儀秦失其辯晉楚失其富歐陽氏曰醫者之於病也必推其病之所自來而治其受病之處病之乘乎氣虛而入焉則善醫者不攻其疾而養其氣氣實則病去此自然之效也中國以土則大於英法以人則眾於俄德以教則親義別序信萬國莫及乃一敗於英二敗於法三敗於日四敗於庚子之聯軍何其氣之委靡陵替如此哉或曰我俗苟且偷安虛驕自大故

不復可用豈山川英靈之氣發洩既極而孔孟大中至正之教亦將墜地也乎竊以元會運世計之知其不然今仍未到午中則中國輿圖猶未極廣教化猶未極盛也曾文正曰凡軍最忌暮氣當道咸之交官軍皆暮氣而賊軍皆朝氣及同治初元賊軍皆暮氣而官軍皆朝氣得失之林皆在乎是諒哉言乎豈惟軍事豈惟咸同官敵軍事自有天地以來事事視此矣今中國運會猶未午中依然進氣安在其不可發奮爲雄耶我

朝

太祖起兵北陞僅二十八甲而席捲四海囊括六合所向莫不克固由朔北山川之氣磅礴鬱積發爲赫赫鴻業抑當時微善必賞微惡必罰無留獄無壅情令簡而速法寬而必之所至也今者山川流峙依然如舊乃知非民之不可用而振作磨勵用民之道失也且夫與民親者莫如牧令牧令至今惟以簿書期會爲急兵刑錢穀爲重凡先王興孝舉廉除暴艾邪所以鼓民爲善閑民爲惡之具皆以爲迂闊遠於事情而不

暇爲故民不知孝弟而凌父兄牧令不問民不遵孔孟而惑邪異牧令不問而民之忠厚樸實孝弟力田者則徒貽笑於奸猾而不聞牧令有所獎勵夫是以善者不勸善氣日消惡者不畏惡氣日熾惡氣日熾則爲刀爲兵爲水爲火爲邪教爲厲疫殺人害物者時時疊出而大勢將不支憂時之士莫不謂宜先飭武備興學術建鐵路開礦廠然皆非可朝種而夕割也遠則必二三十年始可收效至近亦須十年時至今日緩不濟急雖農桑教化兩端爲地方常年應辦

尊宗養諱
之務但廢置已久卽有心人驟欲切實整頓之亦覺
其中有萬難者存也

朝廷望治若渴詎欲久俟爲今之計莫如嚴飭牧令急
訪境內舉善之尤者賞之賞必以實惠不以虛文舉
惡之尤者罰之罰必當其罪不得任意夫舉善之尤
者賞之既不病於濫而其次亦將爭自濯磨不敢委
靡自棄而皆有旦夕蒙賞之望舉惡之尤者罰之既
不病於刻而其次亦將望而生畏不敢復逞而皆有
旦夕蹈刑之警其尤要者督撫察吏卽以此定其陞

降去留庶牧令不敢忽民知勸畏立施立效以急濟
急諸葛忠武治蜀以此也近世識者謂天下之患不
在強鄰而在奸民不在貧弱而在亂臣賊子亦以此
也病源清矣氣漸實矣復圖其遠者大者興教化課
農桑卽今日所已經營學堂鐵路諸端時時振飭而
鼓舞之不使少懈則緩急交修本末兼賅泰西諸國
將不能獨擅其強也夫自同治以來練兵購船二十
餘年曾無少救於敗者誠以平日知練兵而不暇訓
民也知講外交而不暇講內政也知學西人之新法

製器造械而不暇學西人之善政信賞必罰也故臨時敵得以利動吾民而吾民爲其間諜鄉導者比比皆是也自古未有內治不修而能強兵於外者倘牧令仍日簿書期會錢穀兵刑今日急務何暇爲此迂闊竊恐委靡既久馴至氣竭而絕雖有倉鵠不可復救所謂今日急務者且欲理而不得理也夫國於天地必有與立我

朝培養深厚元氣雖削猶易復初必有豪傑起而補救之振作之將與天地並壽而萬國莫強矣謹議

醫心議

今欲醫中國農工商兵之通病其惟有孔子之仁之一方乎仁者孔子經世之心傳也論語記子之言曰苟志於仁矣無惡也又曰我欲仁斯仁至矣而其最能發明孔子之仁示人以法而授人以途者惟孟子孟子曰君子以仁存心愛人者人恆愛之誠以仁者心之德性之具亘古今統中外無人弗有卽無人或弗能也夫相忘則相絕相愛則相濟固天下自然之情亦天下自然之勢是故農與農相愛則農業興工

與工相愛則工藝精商與商相愛則商務盛兵與兵相愛則兵事振農工商兵各以孔子之仁存心而中國自強之基立矣何者農各爲我工各爲我商各爲我兵各爲我此中國積弱之病源也然農工商兵之爲我則又皆起於士之爲我而士之爲我則又皆起於戰國之楊子相浸相衍遂成爲今日不痛不癢自私自利之人心楊子倡教於二千年以前而其勢乃盛於二千年以後極其禍不至四萬萬人之性命盡行塗炭二十三行省之

皇圖盡行割裂義農黃帝堯舜禹湯文武周公孔子之俎豆盡行斬絕不止孟子逆睹其禍之必至於是故特距之而又望天下萬世爲聖人之徒者共距之務使其根株盡除不少留遺乃孟子甫熄其說而漢初又尙無爲漸使楊子根孽復萌潛生默長此毒遂陰中於人心而人不覺然始猶得藉以靖一時申韓雜家之餘毒其害未形久則因無爲生玩愒因玩愒生淡漠淡漠則痛癢不覺休戚不關漸至相忘相絕無復人心其上者老於世故閱歷愈深而趨避愈巧其下

者畏難苟安乘藉便利但圖自肥其身家遂至身列
膠庠者孔子其名而楊子其實而儒者乃無益人國
家爲天下所詬病且因詬病今日爲我之儒者而並
詬病及明德新民成已成物之孔子此識者所由每
睹今日不痛不癢自私自利之人心恨不起楊子而
舉以投彼有吳也夫實楊子而名楊子人猶得指其
名而討其罪害尙淺惟實楊子而名孔子人並不得
指其名而討其罪害乃深今日者列國競強吾華積
弱人多指此爲彼道能勝吾道之證豈知彼所勝者

楊子之道也非孔子之道也孔子之道冠古今配天
地大中至正其隱者則精一危微其顯者則禮樂射
御書數固已胥列國之德育體育智育而包括無遺
矣何得太自菲薄耶至帖括詞章乃漢唐以來庸濫
無用之學於孔子之道乎何涉如其弗信請試觀論
孟學庸中聖賢有一語教人爲帖括詞章乎夫亦可
以恍然悟矣故謂欲興中國必先興孔子之道欲興
孔子之道必先嚴斥今日陰遵楊子而陽冒孔子之
儒者然或以爲如是立言而又恐矯枉過正者將流

於兼愛而不自覺是又世道人心之隱憂也豈知墨子言愛與孟子言愛所以異者非異愛也異兼愛也墨子言兼愛謂愛父如此愛愛路人亦如此愛孟子言愛人者人恆愛之謂吾愛吾父亦欲人之愛其父如吾之愛吾父也推之君臣夫婦昆弟朋友以及日用飲食無不皆然卽論語所謂己欲立而立人已欲達而達人是也此正大學明德新民之正理中庸成己成物之實功也何憂流於兼愛不然孔子一布衣耳旣非天子又非諸侯胡爲車馬棲棲日奔走於列

國之間哉誠以一心之仁所迫而出也呂東萊曰哀莫大於心死而形死次之今日中國之士心死矣士心旣死士氣何恃以振士氣旣不振農工商兵之氣又何恃以振乎士農工商兵之氣旣皆不振國氣又何恃以振乎國者固積士農工商兵而成之者也今欲振國氣必先振農工商兵之氣欲振農工商兵之氣必先振士氣欲振士氣必先活士心然活士心非有物焉以大力轉移之不足以起其死而回之生且夫四子六經士子非盡不深悉也歷代格言史錄士

子非盡不博覽也

熙朝

聖訓律例士子非盡不詳觀也而今日中國士心如是者良由平日以讀書爲富貴利達之階而非以讀書爲忠君愛民之具也且士不爲忠君愛民而學而專爲富貴利達而學則聞見之廣謀畫之多適足以傅之翼而資其毒此今日中國士心所以如是也然其中亦有大原因焉勝朝末際逐處講學分門別戶漸成黨禍

國初務示抑制我

世宗憲皇帝恐日久士氣濡濡必至綱常不敦廉恥不立逐世波靡患出所備之外乃

特頒聖諭廣訓萬言

嚴諭天下臣民每月朔望齊集宣講原以感發臣民之心思激勵臣民之志氣使其奉一尊而歸大同既不至啟講學門戶之禍亦不至使人有廢會友輔仁之憂臣民宜何如恪遵也乃承平日久視爲具文久之廢而不舉餼羊亦亡而天下遂自此多事矣無論庚子拳

匪之禍實由正學不明卽咸同年間髮捻蔓延東南
波及西北諸省幾至顛覆

神州亦何莫非由洪逆教讀館內不設孔子之位一事
發端乎我

皇太后

皇上躬際其難懲前善後

屢頒諭旨昌明正學而天下卒未獲收實效者究其故實
由農工商兵人等皆諉於各有本業無暇爲此迂闊
之事一語所致以故

朝廷雖屢頒誥誠儒吏雖履行示諭而農工商兵人等仍
置若罔聞也夫生人不能一日不衣食卽不能一日
不操本業使人廢本業而從事宣講空言聽從空言
不惟天下無是理亦無是情然竊嘗讀易矣大衍之
數五十其用四十有九去一不用其一不用正所以
爲萬用之本也蓋天道大生不靜專則不能動直地
道廣生不靜翕則不能動闢天地尙然人可以知況
農工商兵無教已久其病勢之危縱有倉鵠尙恐不
能爲力而猶可熟視無覩漠不關心不急施一至大

至切之舉措以新四萬萬人之耳目而齊四萬萬人之心志乎擬懇

當代大人

奏請

皇太后

皇上嚴諭各疆吏轉飭各州縣徧行示諭農工商兵人等除從西教回教道教釋教外每屆朔望自晨至午各止本業擇地齊赴設位專事祇謁

至聖孔子恭講

聖諭廣訓衍說與專訓農工商兵各書農工商以蒙學塾師

董理宣講事宜兵則以營伍文案官幕董理宣講事

宜講畢善互相勸惡互相規得互相慶失互相憫

國步之艱難引為通懼而思共扶危局宗教之衰微援

為通恥而思共昌正學士出其蘊以教農工商兵農

工商兵即出其力以養士庶一道同風唐虞三代之

盛至今猶或遇之將見大道既明人心自善通義既

曉羣疑自釋以興農務則農與農一心通力合作而

各國播種辨土之法可同時仿行而無阻矣以興工

章宗實錄
七
務則工與工一心通力合作而各國製器造械之法
可同時仿行而無阻矣以興商務兵務則商與商一
心兵與兵一心通力合作而各國公司攻守之法可
同時仿行而無阻矣不然風氣未開民疑不釋上日
思以各國善法惠吾民而吾民反怨之嫉之若不終
朝究其患豈惟上施而下不應上亦將窮於無可如
何且將因疑生怨因怨生忿因忿生變設有奸民乘
隙煽惑其間將又釀爲髮捻拳匪之禍而不可收拾
何者欲振興農工商兵諸務必先籌款籌款必取財

於民民方安常習故見聞未充又加以近數十年利
權外溢中國民困已極雖欲出一二以輸之上而苦
於無餘以民疑未釋之際民財奇困之時而欲振興
農工商兵諸務不先施一至大至切之舉措以破民
之疑而動民之心吾恐上之苦心民無從知而欲農
工商兵諸務同時俱興良非易易也果能運以精心
矢以大力胥通國農工商兵而皆納之教化之中其
不遵者嚴加懲治在城論約在鄉論村在兵論營一
約全不舉行者罪坐約長一村全不舉行者罪坐村

尊宗贊議
長一營全不舉行者罪坐統領至三年考績則專以此定大吏有司之陞降去留庶官不敢忽民不敢違楊子之道息而孔子之道著各去爲我之念而生忠愛之心然後令無不從事無不舉而中國自強之勢成矣設慮今日貧民甚多止一日本業卽一日無衣食此事斷難通行然每月三十日各止所業僅朔望耳朔望僅半日耳合之止一日其外尙有二十九日作業之時正多如謂二十九日作業所餘之貲不足給一日止業之用天下豈有是理乎況止業一日正

所以爲二十九日作業之大本也凡根之所著愈深則萌之所發愈暢源之所濬愈深則流之所及愈遠大衍去一不用蓋以此也然此不過爲今日農工商兵澳散已極而欲以此萃之如照此舉行固屬愈多愈善而亦非謂一夫一戶不准遺漏其從西教回教道教釋教與出外行旅流亡乞丐及優役奴隸雜色人等原可仍聽其便且如此之爲各處樸實農工商兵十人有五六遵行者固已可以除爲我之通病而政教大有起色也聖人治天下亦不過使君子多小

人少君子能制小人小人不能爲害而已又安能一
一必其率教哉總之醫之於病必察其病之所自來
而藥之而後其病可除若徒頭痛治頭足痛治足無
當也君相之醫國必察通國之病所自來而治之而
後通國之病可除若徒財置治財兵弱治兵無當也
然則今日通國之病源何在仍曰在楊子爲我而已
今日醫通國之病方何在仍曰在以孔子之仁而已
噫嘻言之易行之難二三豪傑爲時而出庶幾哉一
藥而通國之心思靈再藥而通國之經絡活三藥而

通國之手足強剝極斯復否極斯泰數過時可竊將
日日馨香禱祝求之矣謹議

江氏五節孝碑

附後

朝廷歲令各督撫表揚節孝原以維風化勵人心也然
 或數十百家不得一人況一門而有五乎歷城江氏
 明陝西按察使濬裔也十二傳至鍾秀縣諸生從子
 游聞其世王母本生王母承嗣兩王母世母皆以節
 孝旌於

朝其世王母王歸處士賓元旋寡維時舅姑衰且病王
 屏華飾督傭奴土無寸曠人無晷暇內外皆井井有
 條姪四命宗幹宗德為己子宗幹逝孫振芳振香賴

王成立焉其本生王母劉歸登仕郎濟元恆出金佐夫施藥活人夫卒孺人欲殉二子跪哀乞孺人泣曰吾非弋節烈名恐汝輩闕庭訓不能篤志自立耳子謹受教乃不死嗣遭愈苦志益堅姑壽九旬病卧三年孺人左右扶持如一日訓子尤嚴長從九品宗先孝友純正次宗程亦謹其承嗣兩王母段孺人歸登仕郎殿元孫孺人歸登仕郎占元值髮逆犯境孺人舅福津率團戰歿姑劉氏殉殿元占元俱殉夫兄登元亦殉俱祀昭忠祠兩孺人葬如禮尋孺人嫂謝氏

又卒遺子宗岳亦歿兩孺人哭泣不食欲與俱惟念舅姑不可無後乃強忍度日議以姪宗先兼祧撫如已出閱數年又以次孫振清嗣故姪宗岳及孫鍾秀遊庠兩孺人喜曰吾等他日幸有以見先人於地下汝前程正遠勉之勿負吾等望其世母王處士宗周配也夫歿事舅姑孝撫諸姪慈祖姑壽耄耄優溺皆親扶掖一生艱苦尤甚逮歿夫弟以子振炳嗣嗟乎從容就義士夫猶難觀江氏五節孝歷久不渝茹苦含辛皆五六年非天下之至難者哉

同邑嚴組璋頓首拜撰

曲旌君傳

附後

曲旌君萬松字壽山山左歷城人也祖法舜父智世有積德爲鄉人望旌君生而樸直及長嚴取子慎操持與人信事父母孝咸同聞髮捻犯境旌君率團力拒被創鉅猶決命爭前胞弟萬梧被匪擄弟婦趙氏知立投井死遺五子一女俱幼家復貧旌君撫如己出嗣以勦匪功蒙前撫丁賞六品軍功乃推獎於父配何氏生子女各一亦能曲盡孝慈上奉舅姑下撫諸子姪爲飲食爲縫紉恆終夜不眠積勞成疾以此

雙目盲迫姪輩成立嘗泣謂曰汝等幸矣吾雙目盲
矣然吾自今有以見汝母於地下矣初萬梧自匪脅
去經年無耗旌君裹糧往尋行炎日中跋涉數百里
迄無知者忽經蒙陰高家樓見墓側短碣書萬梧名
詢之士人知弟逃回卒此乃移柩歸與弟婦合葬村
有孫姓者因事約數人夜赴河套圈途遇防河勇丁
劫富室歸恐其識反誣爲盜盡執之送縣將置法旌
君聞率村衆急具狀願以全家保之蒙前撫張提案
親訊始釋數人置諸勇於法旌君幼好讀書貧不給

去而事農圃逮壯勤儉致富貲累鉅萬好施與荒年
出餘粟以濟人捐其價里中貧寡無依多方爲謀生
計遇有不能婚嫁喪葬者每自任之見善如不及恆
忙忙無虛日然偶得閒輒讀書一日讀李氏篇至均
無貧和無寡數語喟然歎曰聖人之言豈惟治國之
謨抑持家之法學者斷章取義可矣如吾僅生一男
弟遺五子今幸賴先人靈得免飢餓設吾歿後兄弟
析居吾子獨取產一半吾姪共取產一半多寡旣異
貧富不攸分乎乃析產爲六姪得五子得一猶不欲

真宗書讀
顯居盛名遂復繼雲貴雲華二姪爲己子與子雲連
同受其半餘雲富雲榮雲山三姪同受其半因設筵
集親友書券爲證並召己子訓之曰人生富貴皆有
定數汝命當貧雖不均亦貧汝命不當貧雖均亦不
貧且將愈富人特患不知命耳何患貧子謹受命堂
弟萬柏萬株貧無子均爲立嗣置產萬桐有子雲亮
少失業公收養之亦予田宅數畝焉壽七十二歿子
孫繁衍至數十口光緒辛丑歷城搢紳爲之請

旌併公送入祀忠義孝弟祠子聞之重其事亦躬送焉

因約畧旌君平生事實而爲之傳贊曰潛德幽光鬱
而必發伊古行高當時卽名播後世余觀旌君破大
敵救大難雖古豪傑何多讓而其事雙親友諸弟均
產業樂施濟則更有過人遠者謂非得天獨厚歟竊
謂三代盛時鄉曲士民忠義孝悌之行不少概見迨
後世名臣碩儒始克當之降至布衣蓋亦鮮矣如旌
君者僻處鄉曲望重一方雖歿世搢紳先生猶嘖嘖
稱道弗衰至今思其人觀其行繹其言恍令我神遊
於三代之盛而與古人爲徒也於戲可以風矣

鐵嶺郭鑑襄頓首拜撰

尊宗贅議校刊姓氏

黃錫鴻岐生

段振聲玉甫

譚奎光靜齋

嚴毅彤臣

同邑

孔繼儒幼元

全校刊

王鴻勳如九

李慶璋莪卿

江祿萬綏之

路文濤雪泉

續入校刊尊宗贅議姓氏

章邱王廣泗四泉

程德馨香山

江學忠道源振芳菊航

同邑

謝瀛昱小篷

全校刊

季元震東藩

曲立德心齋

林清吉佑之

長清周彤桂復卿

鄒縣孟慶棠蔭南

續入校刊尊宗贊議姓氏

章邱王廣泗四泉

